



Broj: 01-50-1-15-11/15
Sarajevo, 13.5.2015.

PRIMJENO: 22. 5. 2015.			
Organizaciona jedinica	Klasifikaciona oznaka	Redni broj	Broj priloga

B

ZAPISNIK

11. sjednice Predstavničkog doma Parlamentarne skupštine Bosne i Hercegovine, održane 13. 5. 2015.

Sjednica je počela u 10,10 sati. Prisustvovalo je 37 poslanika.¹

Odsustvo sa sjednice opravdali su: Šemsudin Mehmedović, Hazim Rančić, Mensura Beganović, Diana Zelenika i Dušanka Majkić.

Sjednici su prisustvovali predsjedavajući i članovi Vijeća ministara BiH.

Iz međunarodnih organizacija sjednicu su pratili predstavnici OHR-a, OSCE-a i EUSR-a, a iz nevladinih organizacija prisustvovao je predstavnik CCI-ja. Sjednici je prisustvovao predstavnik britanske ambasade, te predstavnici: Državne agencije za radijacijsku i nuklearnu sigurnost BiH, Agencije za forenzička ispitivanja i vještačenja BiH, Granične policije BiH i Državne agencije za istrage i zaštitu BiH.

Predsjedavajući Doma Šefik Džaferović rekao je da će poslanicima, u skladu s članom 171. Poslovnika, na početku sjednice, a prije rasprave o dnevnom redu, biti omogućeno postavljanje poslaničkih pitanja u usmenoj formi.

U skladu s članom 172. Poslovnika, najave za postavljanje poslaničkih pitanja u usmenoj formi dostavili su sljedeći poslanici:

- **Šemsudin Mehmedović** – ministru sigurnosti BiH (*najava pitanja upućena je u pripremi 10. sjednice Doma, ali tada nije dat odgovor u usmenoj formi, pa je konstatirano da će se odgovor zatražiti na prvoj narednoj sjednici Doma predviđenoj za postavljanje pitanja u usmenoj formi*),
- **Fehim Škaljić** – predsjedavajućem Vijeća ministara BiH,
- **Salko Sokolović** – ministru finansija i trezora BiH,
- **Jasmin Emrić** – predsjedavajućem Vijeća ministara BiH i ministru sigurnosti BiH,
- **Damir Arnaut** – predsjedavajućem Vijeća ministara BiH i ministru civilnih poslova BiH,
- **Maja Gasal-Vražalica** - predsjedavajućem Vijeća ministara BiH i ministru finansija i trezora BiH i
- **Borislav Bojić** - predsjedavajućem Vijeća ministara BiH.

¹ Nakon rasprave o dnevnom redu, a zbog neusvajanja njihovog prijedloga za dopunu dnevnog reda, sjednicu su napustili poslanici iz Kluba SNSD-a.

Ove najave su, u skladu s članom 172. Poslovnika, dostavljene predsjedavajućem Vijeća ministara BiH i onom članu Vijeća ministara BiH na koga se pitanje odnosi. Osiguran je i direktan TV prijenos ovog dijela sjednice, u skladu s članom 171. stav (1) Poslovnika.

Nakon ovih napomena, pristupilo se usmenom postavljanju poslaničkih pitanja i davanju odgovora redoslijedom dostavljanja najava.

Šemsudin Mehmedović

Pitanje upućeno ministru sigurnosti BiH (najava pitanja upućena je u pripremi 10. sjednice Doma, ali tada nije dat odgovor u usmenoj formi, pa je konstatirano da će se odgovor zatražiti na prvoj narednoj sjednici Doma predviđenoj za postavljanje pitanja u usmenoj formi): „Do kada mislite držati u Imigracionom centru, tj. „logoru“, stranca po imenu Imad El Misri zvani Abu Hamza, kojem je oduzeto bh. državljanstvo zbog navodne „prijetnje po nacionalnu sigurnost BiH“? Napominjem da je spomenuto lice već sedam godina lišeno slobode i nalazi se u spomenutoj ustanovi. Moje pitanje je - Do kada? Kao i kada prestaju razlozi njegovog boravka u ovom, usudit ću se reći logoru, jer je lišen svih građanskih prava? Da li ćete predložiti izmjene Zakona o OSA-i, čime će se izbjeći samovolja jednog čovjeka da donosi ovakvu tešku kvalifikaciju kojom se uništavaju ljudski životi, što je suprotno svim mogućim međunarodnim konvencijama o ljudskim pravima?“

- S obzirom na to da poslanik Šemsudin Mehmedović nije bio prisutan na sjednici, predsjedavajući je konstatirao da će ovo pitanje biti uvršteno na prvu narednu sjednicu predviđenu za postavljanje pitanja u usmenoj formi.

Fehim Škaljić

Pitanje upućeno predsjedavajućem Vijeća ministara BiH: „U kojoj je fazi izgradnja mehanizma koordinacije kad znamo da je u Federaciji BiH obaveza općina prema kantonima minimalna, a kantona prema Federaciji, u funkcionalnom smislu, skoro nikakva, a na državnom nivou u izvršnoj vlasti ne učestvuje dio vlasti koje pokriva 49% teritorije? Ko upravlja procesom mehanizma koordinacije u Bosni i Hercegovini, u kojoj je fazi izgradnja tog mehanizma, koji su rokovi i kad možemo na stolu imati taj dokument? Niko nas o tome službeno kao Parlament nije obavijestio.“

Salko Sokolović

Pitanje upućeno ministru finansija i trezora BiH: „Ured za reviziju institucija BiH proveo je reviziju učinka o temi: „Izdaci za sudske sporove“. Nalazi revizije ukazuju da institucije BiH rijetko preduzimaju mjere za prevenciju sudskih sporova, a da su analize sudskih sporova malobrojne i zakašnjele. To dovodi do dodatnih izdataka za sudske sporove. U periodu 2008. – 2013. godine institucije BiH kao tužena strana izgubile su 313 parničnih predmeta. Izgubljeni parnični predmeti imaju trend povećanja. Institucije BiH kasne i u izvršavanju sudskih presuda, što uzrokuje dodatne sudske troškove. Od 14,6 miliona KM isplaćenih izdataka za sudske sporove u tretiranom periodu (2008. – 2013.), oko 700 000 KM isplaćeno je kao posljedica neblagovremene realizacije sudskih presuda. Imajući u vidu navedeno, od Pravobranilaštva BiH tražim informaciju o preduzetim aktivnostima da se ovaj negativni trend zaustavi, s obzirom na to da je Pravobranilaštvo BiH odgovorno za zastupanje pred nadležnim sudovima. Također, i Ministarstvu finansija i trezora BiH, koje je odgovorno za realizaciju i evidentiranje izdataka po sudskim sporovima.“

- Odgovor na pitanje dao je ministar finansija i trezora BiH Vjekoslav Bevanda.

Jasmin Emrić

Pitanje upućeno predsjedavajućem Vijeća ministara BiH i ministru sigurnosti BiH: „Budući da se nezvanično i nepotvrđeno prenose informacije u javnosti da Hrvatska već odlaže radioaktivni otpad i istrošeno nuklearno gorivo u vojno-skladišnom kompleksu Čerkezovac, masiv Trgovske gore, općina Dvor, Republika Hrvatska, tražim od nadležnog ministarstva, nadležnih institucija i organa da odgovore javnosti da li su takve informacije istinite, koliko su utemeljene, kojim informacijama raspolažu, te da li je već ugroženo zdravlje i život stanovništva općina: Velika Kladuša, Bužim, Novi Grad/Bosanski Novi, Prijedor, Cazin i Bosanska Krupa.“

- Odgovor na pitanje dao je ministar sigurnosti BiH Dragan Mektić. Poslanik Jasmin Emrić izrazio je nezadovoljstvo dobivenim odgovorom i zatražio dostavljanje odgovora u pisanoj formi.

Damir Arnaut

Pitanje upućeno predsjedavajućem Vijeća ministara BiH i ministru civilnih poslova BiH: „Da li je Ministarstvo civilnih poslova BiH, kao nadležno ministarstvo, vodilo bilo kakve konsultacije ili pregovore s nadležnim organima Australije u vezi s predloženim Sporazumom o socijalnom osiguranju između dvije zemlje nakon juna 2013. godine, te ako jeste, između koga su ti kontakti održani i kada? (Nije potrebno spominjati „redovne konsultacije“ koje su predstavnici MVPBiH održali u 2014. godini „sa sekretarom Ambasade i Stalne misije pri UN-u u Beču“, a koje je VM već spomenulo u svom aktu broj: 05-50-1-685/15, od 8.5.2015.)

- Odgovor na pitanje dao je zamjenik ministra civilnih poslova BiH Đorđe Milićević. Poslanik Damir Arnaut zatražio je dostavljanje odgovora u pisanoj formi.

Maja Gasal-Vražalica

Pitanje upućeno predsjedavajućem Vijeća ministara BiH i ministru finansija i trezora BiH: „Molim da mi odgovorite da li postoji problem u vezi s pogrešnom uplatom doprinosa za zdravstveno osiguranje i osiguranje za slučaj nezaposlenosti za zaposlene u institucijama BiH koji imaju prebivalište u Federaciji BiH.“

- Odgovor na pitanje dao je ministar finansija i trezora BiH Vjekoslav Bevanda. Poslanica Maja Gasal-Vražalica zatražila je dostavljanje odgovora u pisanoj formi.

Borislav Bojić

Pitanje upućeno predsjedavajućem Vijeća ministara BiH: „Zašto Agencija za forenzička ispitivanja i vještačenja već četiri mjeseca nije realizirala zaključak Predstavničkog doma PSBiH i zašto nije javnost i Parlamentarnu skupštinu BiH do sada obavijestila o razlozima zbog kojih nije uradila traženo vještačenje?“

- Predsjedavajući je konstatirao da je odredbama Poslovnika predviđeno da odgovor u usmenoj formi daje predsjedavajući Vijeća ministara BiH ili ministar kome je pitanje upućeno, te da je u ovom slučaju potrebno da odgovor pripremi direktorica Agencije za forenzička ispitivanja i vještačenja, a da ga na narednoj sjednici prezentira predsjedavajući Vijeća ministara BiH ili ministar sigurnosti BiH.

* * * * *

Predsjedavajući Doma Šefik Džaferović rekao je da su u pripremi ove sjednice Doma održane sjednice svih komisija Doma i zajedničkih komisija oba doma, osim Zajedničke komisije za nadzor nad radom OSABiH, koja još uvijek nije konstituirana, a zatim je podsjetio na dopune dnevnog reda sjednice Doma, kako slijedi:

Na dnevni red dodate su:

- **Tačka 3.** – Zahtjev Vijeća ministara BiH za razmatranje Prijedloga zakona o izmjenama i dopunama Krivičnog zakona BiH po hitnom postupku, u skladu s članom 133. Poslovnika, zakon broj: 01,02-02-1-7/15, od 12.5.2015.;
- **Tačka 4.** - Prijedlog zakona o Budžetu institucija BiH i međunarodnih obaveza BiH za 2015. godinu, predlađač: Predsjedništvo BiH, zakon broj: 01,02-02-1-6/15, od 5.5.2015. (prvo čitanje);
- **Tačka 16.** - Izvještaj Komisije za saobraćaj i komunikacije o javnom saslušanju predstavnika BHANSA, BHDCA i Vijeća ministara BiH u vezi s propustima navedenim u Izvještaju o izvršenoj reviziji učinka o temi: „Kontrola zračnog saobraćaja Bosne i Hercegovine“, broj: 01/5-16-1-1131/14, od 27.4.2015.;
- **Tačka 22.** - Prijedlog odluke o imenovanju sekretara Predstavničkog doma Parlamentarne skupštine BiH;
- **Tačka 23.** - Prijedlog odluke o imenovanju sekretara Zajedničke službe Parlamentarne skupštine BiH;
- **Tačka 24.** - Prijedlog zaključka poslanika Jasmina Emrića, koji glasi: „Zadužuje se Vijeće ministara BiH da za prvu narednu sjednicu Predstavničkog doma pripremi i dostavi Informaciju o postupku razgovora o ocjenjivanju i odobrenju pogodnosti lokacije na Trgovskoj gori za smještaj Centra za zbrinjavanje radioaktivnog otpada koji vodi Državni zavod za radiološku i nuklearnu sigurnost Republike Hrvatske“, akt broj: 01-50-1-628-1/15, od 29.4.2015.;
- **Tačka 29.** - Razmatranje ostavke Semihe Borovac na mjesto članice i prve zamjenice Nezavisne komisije za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku Sud Bosne i Hercegovine, strani sudovi za djela predviđena Krivičnim zakonom Bosne i Hercegovine ili međunarodnim ugovorom čija je potpisnica Bosna i Hercegovina, ili drugi sud u skladu sa zakonom Bosne i Hercegovine, akt broj: 01,02-34-1-501/15, od 22.4.2015., i akt broj: 05/6-34-1-501/15, od 20.4.2015.;
- **Tačka 30.** - Davanje saglasnosti za ratifikaciju Sporazuma o vojnoj finansijskoj saradnji između Vijeća ministara Bosne i Hercegovine i Vlade Republike Turske i Implementacioni protokol u vezi s finansijskom pomoći između Vijeća ministara Bosne i Hercegovine i Vlade Republike Turske, broj: 01,02-05-2-644/15, od 4.5.2015., i
- **Tačka 31.** - Davanje saglasnosti za ratifikaciju Amandmana broj 3 na Ugovor o finansiranju sklopljen između Bosne i Hercegovine i Evropske investicione banke 21.12.2005. u Sarajevu i 28.12.2005. u Luksemburgu, s naknadnim izmjenama („Ugovor o finansiranju“) za projekat – *Željeznice u BiH II. (Fi 23.376)*, broj: 01,02-05-2-650/15, od 6.5.2015.

Dopunjene su:

- **Tačka 5.** - Prijedlog zakona o izmjenama i dopunama Zakona o sportu u BiH, predlagač: poslanik Denis Bećirović, zakon broj: 01-02-1-3/15, od 26.2.2015., *s Izvještajem Ustavnopravne komisije*, koji je negativan i
- **Tačka 7.** - Prijedlog zakona o dopuni Izbornog zakona BiH, predlagač: poslanik Damir Arnaut, zakon broj: 01-02-1-2/15, od 23.2.2015., *s Mišljenjem Ustavnopravne komisije*, koje je negativno.

S ranijeg dnevnog reda skinuta je:

- **Tačka 14.** - Izvještaji Centralne banke BiH za 2014. godinu:
 - 1) Finansijski izvještaji za godinu koja je završila 31.12.2014. i
 - 2) Godišnji izvještaj Centralne banke BiH za 2014. godinu, broj: 01-50-19-496/15, od 3.4.2015., na zahtjev Centralne banke BiH, zbog nemogućnosti prisustva sjednici Doma.

Nakon ovih napomena predsjedavajući je otvorio raspravu o dnevnom redu sjednice.

Nikola Špirić predložio je dopunu dnevnog reda tačkom: Informacija Vijeća ministara BiH o terorističkom napadu u Zvorniku.

Staša Košarac je, u ime poslanika iz Kluba SNSD-a, predložio dopunu dnevnog reda tačkom koja glasi: Odluka o razrješenju poslanika Šefika Džaferovića s dužnosti predsjedavajućeg Predstavničkog doma Parlamentarne skupštine BiH.

U raspravi o dnevnom redu učestvovali su: Aleksandra Pandurević i Momčilo Novaković.

Nakon toga pristupilo se izjašnjavanju o prijedlozima za dopunu dnevnog reda.

„Za“ prijedlog Nikole Špirića za dopunu dnevnog reda tačkom: Informacija Vijeća ministara BiH o terorističkom napadu u Zvorniku glasalo je 11 poslanika (iz Federacije BiH pet, iz Republike Srpske šest), „protiv“ sedam, a suzdržanih“ je bilo 15 poslanika. Predsjedavajući je konstatirao da nema potrebne entitetske većine i da će Kolegij Doma kao komisija obaviti naknadno usaglašavanje o ovom prijedlogu.

Prijedlog poslanika iz Kluba SNSD-a za dopunu dnevnog reda tačkom: Odluka o razrješenju poslanika Šefika Džaferovića s dužnosti predsjedavajućeg Predstavničkog doma Parlamentarne skupštine BiH nije prihvaćen – „za“ je glasalo šest poslanika (iz Republike Srpske), „protiv“ 25, a „suzdržana“ su bila dva poslanika.

Predsjedavajući je konstatirao da 11. sjednica Predstavničkog doma ima sljedeći

DNEVNI RED

1. Usvajanje Zapisnika 10. sjednice Predstavničkog doma Parlamentarne skupštine BiH;

2. Komentari na dobivene odgovore na poslanička pitanja;
3. Zahtjev Vijeća ministara BiH za razmatranje Prijedloga zakona o izmjenama i dopunama Krivičnog zakona BiH po hitnom postupku, u skladu s članom 133. Poslovnika, zakon broj: 01,02-02-1-7/15, od 12.5.2015.;
4. Prijedlog zakona o Budžetu institucija BiH i međunarodnih obaveza BiH za 2015. godinu, predlađač: Predsjedništvo BiH, zakon broj: 01,02-02-1-6/15, od 5.5.2015. (prvo čitanje);
5. Prijedlog zakona o izmjenama i dopunama Zakona o sportu u BiH, predlađač: poslanik Denis Bećirović, zakon broj: 01-02-1-3/15, od 26.2.2015., sa Izvještajem Ustavnopravne komisije;
6. Prijedlog zakona o izmjenama i dopunama Zakona o policijskim službenicima Bosne i Hercegovine, predlađač: Vijeće ministara BiH, zakon broj: 01,02-02-1-38/14, od 3.11.2014. (prvo čitanje);
7. Prijedlog zakona o dopuni Izbornog zakona BiH, predlađač: poslanik Damir Arnaut, zakon broj: 01-02-1-2/15, od 23.2.2015., s Mišljenjem Ustavnopravne komisije;
8. Izvještaj komisije Kolegija o nastojanju za postizanje saglasnosti o Zahtjevu poslanika Mirsada Mešića za razmatranje Prijedloga zakona o izmjeni Zakona o Javnom radiotelevizijskom sistemu Bosne i Hercegovine po hitnom postupku, u skladu s članom 133. Poslovnika, zakon broj: 01-02-1-5/15, od 26.3.2015.;
9. Izvještaj o radu Vijeća ministara BiH za 2014. godinu, broj: 01,02-50-19-422/15, od 23.3.2015.;
10. Izvještaji Ministarstva vanjske trgovine i ekonomskih odnosa BiH:
 - a) Izvještaj o izdatim ispravama za vanjskotrgovinski promet oružja, vojne opreme, proizvoda dvojne i posebne namjene za 2013. godinu,
 - b) Izvještaj o realizaciji vanjskotrgovinskog prometa oružja, vojne opreme, proizvoda dvojne i posebne namjene za 2012. godinu, akt broj: 01,02-24-1446/14, od 26.12.2014.;
11. Izvještaj o učešću pripadnika Oružanih snaga Bosne i Hercegovine u operacijama podrške miru, materijal Predsjedništva BiH, akt broj: 01,02-03-42/15, od 5.1.2015.;
12. Izvještaj o radu Odbora za žalbe građana Parlamentarne skupštine BiH za 2014. godinu, broj: 05/2-50-19-238/15, od 10.2.2015.;
13. Izvještaj o radu parlamentarnog vojnog povjerenika BiH za 2014. godinu, broj: 01,02-50-19-338/15, od 3.3.2015.;
14. Izvještaj o radu Vijeća nacionalnih manjina BiH za 2014. godinu, akt broj: 01,02-50-19-373/15, od 12.3.2015.;
15. Izvještaj o radu Nezavisne komisije za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku Sud Bosne i Hercegovine, strani sudovi za djela predviđena Krivičnim zakonom Bosne i Hercegovine ili međunarodnim ugovorom čija je potpisnica Bosna i Hercegovina, ili drugi sud u skladu sa zakonom Bosne i Hercegovine za 2014. godinu, broj: 01,02-37-451/15, od 26.3.2015.;
16. Izvještaj Komisije za saobraćaj i komunikacije o javnom saslušanju predstavnika BHANSA, BHDCA i Vijeća ministara BiH u vezi s propustima navedenim u Izvještaju o izvršenoj reviziji učinka o temi: „Kontrola zračnog saobraćaja Bosne i Hercegovine“, broj: 01/5-16-1-1131/14, od 27. 4. 2015.;
17. Izvještaj o radu Upravnog odbora Izvozno-kreditne agencije BiH za 2014. godinu, broj: 01,02-50-19-486/15, od 1.4.2015.;
18. Informacija Izvozno-kreditne agencije BiH o mjerama i radnjama koje su preduzete s ciljem otklanjanja teškoća i osiguranja potrebnih preduslova za normalan rad, broj: 01-50-19-487/15, od 1.4.2015.;
19. Informacija o Godišnjem planu obuke i vježbi pripadnika i jedinica Oružanih snaga BiH u inozemstvu za 2015. godinu, materijal Ministarstva odbrane BiH, broj: 03/1-

- 03-971/14, od 1.9.2014., sa Izmjenama i dopunama Godišnjeg plana obuke i vježbi pripadnika i jedinica Oružanih snaga BiH u inozemstvu za 2015. godinu, broj: 03/1,03/1a-03-339/15, od 3.3.2015.;
20. Državni akcioni plan o hitnim slučajevima zaštite stanovništva od jonizirajućeg zračenja u slučaju vanrednog događaja, nuklearne nesreće ili nastanka štete, materijal Državne regulatorne agencije za radijacijsku i nuklearnu sigurnost BiH, broj: 01,02-04-1372/14, od 16.12.2014.;
 21. Prijedlog rezolucije o Sutorini, predlagač: poslanik Denis Bećirović, broj: 01-02-2-1440/14, od 24.12.2014.;
 22. Prijedlog odluke o imenovanju sekretara Predstavničkog doma Parlamentarne skupštine BiH;
 23. Prijedlog odluke o imenovanju sekretara Zajedničke službe Parlamentarne skupštine BiH;
 24. Prijedlog zaključka poslanika Jasmina Emrića, koji glasi: „Zadužuje se Vijeće ministara BiH da za prvu narednu sjednicu Predstavničkog doma pripremi i dostavi Informaciju o postupku razgovora o ocjenjivanju i odobrenju pogodnosti lokacije na Trgovskoj gori za smještaj Centra za zbrinjavanje radioaktivnog otpada koji vodi Državni zavod za radiološku i nuklearnu sigurnost Republike Hrvatske“, akt broj: 01-50-1-628-1/15, od 29.4.2015.;
 25. Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za imenovanje generalnog revizora i zamjenika generalnog revizora Ureda za reviziju institucija Bosne i Hercegovine, predlagač: Zajednički kolegij oba doma Parlamentarne skupštine BiH, broj: 01,02-34-1-538/15, od 9.4.2015.;
 26. Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za izbor četiri člana Upravnog odbora Agencije za razvoj visokog obrazovanja i osiguranje kvaliteta, predlagač: Zajednički kolegij oba doma Parlamentarne skupštine BiH, broj: 01,02-34-1-539/15, od 9.4.2015.;
 27. Prijedlog zaključka o formiranju Interresorne radne grupe za izmjenu izbornog zakonodavstva BiH, predlagač: Zajednički kolegij oba doma Parlamentarne skupštine BiH, broj: 01,02-34-1-540/15, od 9.4.2015.;
 28. Prijedlog odluke o izmjenama Odluke o izboru članova zajedničkih komisija oba doma Parlamentarne skupštine BiH, predlagač: poslanik Damir Bećirović, akt broj: 01-50-19-1412-1/14, od 8.4.2015.;
 29. Razmatranje ostavke Semihe Borovac na mjesto članice i prve zamjenice Nezavisne komisije za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku Sud Bosne i Hercegovine, strani sudovi za djela predviđena Krivičnim zakonom Bosne i Hercegovine ili međunarodnim ugovorom čija je potpisnica Bosna i Hercegovina, ili drugi sud u skladu sa zakonom Bosne i Hercegovine, akt broj: 01,02-34-1-501/15, od 22.4.2015., i akt broj: 05/6-34-1-501/15, od 20.4.2015.;
 30. Davanje saglasnosti za ratifikaciju Sporazuma o vojnoj finansijskoj saradnji između Vijeća ministara Bosne i Hercegovine i Vlade Republike Turske i Provedbenog protokola u vezi s finansijskom pomoći između Vijeća ministara Bosne i Hercegovine i Vlade Republike Turske, broj: 01,02-05-2-644/15, od 4.5.2015.;
 31. Davanje saglasnosti za ratifikaciju Amandmana broj 3 na Ugovor o finansiranju sklopljen između Bosne i Hercegovine i Evropske investicione banke 21.12.2005. u Sarajevu i 28.12.2005. u Luksemburgu, s naknadnim izmjenama (Ugovor o finansiranju) za projekat – *Željeznice u BiH II. (Fi 23.376)*, broj: 01,02-05-2-650/15, od 6.5.2015.

* * * * *

Ad.1. Usvajanje Zapisnika 10. sjednice Predstavničkog doma Parlamentarne skupštine BiH

Predsjedavajući je rekao da je poslanicima dostavljen Zapisnik.

Nije bilo primjedbi na Zapisnik.

Zapisnik 10. sjednice usvojen je jednoglasno - s 27 glasova "za" (iz Federacije BiH 22, iz Republike Srpske pet).

Ad.2. Komentari na dobivene odgovore na poslanička pitanja

Predsjedavajući je podsjetio da su, u skladu s članom 174. Poslovnika, do ove sjednice Doma pitanja i inicijative u pisanoj formi postavili poslanici:

- **Maja Gasal-Vražalica** – pitanja postavila Ministarstvu vanjske trgovine i ekonomskih odnosa BiH, odnosno Uredu za veterinarstvo BiH,
- **Sadik Ahmetović** – pitanje postavio predsjedavajućem Vijeća ministara BiH i ministru finansija i trezora BiH,
- **Senad Šepić** –inicijativu uputio Vijeću ministara BiH,
- **Mladen Bosić** – inicijativu uputio Kolegiju Predstavničkog doma,
- **Nenad Lalić** – pitanje postavio Upravnom odboru Skijaškog saveza BiH,
- **Nikola Lovrinović** – pitanje postavio Ministarstvu komunikacija i prometa BiH i JP Autoceste Federacije BiH,
- **Safer Demirović** – pitanje postavio Federalnom ministarstvu energije, rudarstva i industrije i
- **Mirsad Isaković i Damir Arnaut** – pitanja su postavili Uredu visokog predstavnika u BiH.

Sadržaj postavljenih pitanja i inicijativa je sljedeći:

Maja Gasal-Vražalica

Pitanja upućena Ministarstvu vanjske trgovine i ekonomskih odnosa BiH, odnosno Uredu za veterinarstvo BiH:

1. „Da li Ured za veterinarstvo BiH vodi registar svih označenih pasa i mačaka (član 8/3)?
2. Koliko i kome je izdato Uputstvo, odnosno da li nadležno ministarstvo ima evidenciju izdatih dozvola za formiranje skloništa, odnosno higijenskih servisa; da li nadležno ministarstvo prati uslove, rad i djelovanje formiranih skloništa, higijenskih servisa, koja se trebaju pridržavati izdatih uputstava? (Veza: član 28. (5) „*Nadležni upravni organ kantona, grada ili općine izdaje dozvolu za formiranje skloništa za životinje, na osnovu uputstva koje propisuje nadležno ministarstvo, a na prijedlog Ureda, te vodi upisnik skloništa za životinje.*“ i član 29. (4) „*Nadležni upravni organ kantona, grada ili općine izdaje dozvolu za formiranje higijenskog servisa za životinje, a na osnovu uputstva koje propisuje nadležno ministarstvo, a na prijedlog Ureda.*“)

3. Da li je osnovana Etička komisija i Stručni savjet? Ako nije, zašto nije? Ako jeste – ko su bili članovi Etičke komisije i Stručnog savjeta (posebno Savjeta čiji se članovi finansiraju iz budžeta nadležnog ministarstva)?
4. Budući da nadzor nad provođenjem ovog zakona vrši Ured za veterinarstvo BiH pri nadležnom ministarstvu, od dana stupanja na snagu do danas koja su vaša saznanja u vezi s njegovom primjenom i poštivanjem? Da li nadležno ministarstvo ima podatke o broju prekršilaca ovog zakona, fizičkih i pravnih lica koja drže neregistrirane kućne ljubimce, kao i onih protiv kojih je podnesena prijava za zlostavljanje životinja?
5. Da li su doneseni svi propisani podzakonski akti i da li je ispoštovan zakonski rok za donošenje podzakonskih akata (član 43.)?“

Nenad Lalić

Pitanje upućeno Upravnom odboru Skijaškog saveza BiH: „Šta ste konkretno uradili na planu obeštećenja i ublažavanju štetnih posljedica prema najboljoj skijašici Bosne i Hercegovine i Republike Srpske Žani Novaković, koju ste uskratili za stipendiju od Olimpijske solidarnosti, čime je naša najbolja skijašica i učesnica dvije olimpijade, te brojnih svjetskih i evropskih takmičenja, ostala bez sredstava potrebnih za daljnji nastavak sportske karijere?“

Sadik Ahmetović

Pitanja upućena predsjedavajućem Vijeća ministara BiH i ministru finansija i trezora BiH:

1. „Koliko se novca na godišnjem nivou iz budžeta BiH izdvaja za plaćanje zakupa za prostor u kojem su smještene državne institucije?
2. Koja su pravna i fizička lica zakupodavci prostora za smještaj institucija, pod kojim uslovima i za koliko novca?“

Senad Šepić

Inicijativa upućena Vijeću ministara BiH: „Predlažem da Vijeće ministara BiH hitno, a najkasnije u roku od 60 dana, izradi i u parlamentarnu proceduru uputi izmjene koje će osigurati da se mlijeko proizvedeno u BiH može izvoziti u zemlje EU.“

Mladen Bosić

Inicijativa upućena Kolegiju Predstavničkog doma Parlamentarne skupštine BiH: „U skladu s članom 8. Poslovnika Predstavničkog doma Parlamentarne skupštine BiH („Službeni glasnik BiH“, broj 79/14), pokrećem inicijativu za uvrštavanje u dnevni red tačke: „Informacija Regulatorne agencije za komunikacije BiH o cijenama usluga mobilnih operatera u Bosni i Hercegovini.“

Nikola Lovrinović

Pitanje upućeno Ministarstvu komunikacija i prometa BiH i JP Autoceste Federacije BiH: „Informiran sam da se u općini Vukosavlje izvode pripremni radovi za gradnju autoputa u blizini sela Gornji i Donji Pećnik i Gnionica. Navodno se izvode minerski radovi koji izazivaju velike probleme mještanima navedenih sela, od kojih su prva dva povratnička naselja. Naime, usljed detonacija mještanima se pojavljuju pukotine u kućama, pa čak i u mjesnoj crkvi. Također su im, navodno, data obećanja da će dobiti obeštećenje, što se još nije dogodilo. Niti radovi prestaju niti ih iko posjećuje u vezi s rješavanjem problema. Zbog toga molim informaciju šta se događa i kada će ovaj problem biti riješen.“

Safer Demirović

Pitanje upućeno Federalnom ministarstvu energije, rudarstva i industrije: „U skladu s članom 5. Pravilnika o uslovima koje moraju ispunjavati pravna lica za izradu elaborata o kategorizaciji ugljenih slojeva i jama i razvrstavanje jamskih prostorija prema stepenu opasnosti od metana i elaborata o klasifikaciji i kategorizaciji jame, odnosno jamskih prostorija prema stepenu opasnosti od eksplozivne ugljene prašine u pogledu osposobljenosti i opremljenosti i postupku njihovog odobrenja („Službene novine Federacije BiH“, broj 68., od 19.10.2011.), laboratorijska ispitivanja eksplozivnih osobina ugljene prašine mogu se obavljati isključivo u akreditiranim laboratorijama. S obzirom na to da u BiH ne postoje akreditirane laboratorije za ispitivanje eksplozivnih osobina ugljene prašine, šta je FMERI preduzeo u smislu pomoći institucijama (laboratorijama) za sticanje akreditacije, odnosno da li FMERI ima mogućnosti da riješi ovaj problem na neki drugi način?“

Mirsad Isaković i Damir Arnaut

Pitanje upućeno Uredu visokog predstavnika u BiH: „Uzimajući u obzir da su među predsjedavajućim i devet ministara u Vijeću ministara BiH samo dvije žene, kao i da među deset zamjenika ministara nema žena, da li je trenutni sastav Vijeća ministara BiH izabran u skladu s članom 20. Zakona o ravnopravnosti spolova u BiH?“

Predsjedavajući je podsjetio da su do ove sjednice Doma dostavljeni sljedeći odgovori:

- Na pitanje **Aleksandre Pandurević** odgovor je dostavilo Vijeće ministara BiH,
- Na pitanje **Senada Šepića**, postavljeno u pisanoj formi na 9. sjednici Doma, odgovor je dostavila Vlada Federacije BiH,
- Na pitanje **Mirsada Isakovića**, postavljeno u usmenoj formi na 10. sjednici Doma, odgovor je dostavilo Vijeće ministara BiH,
- Na pitanje **Nenada Lalića**, postavljeno u pisanoj formi na 10. sjednici Doma, odgovor je dostavio Skijaški savez BiH,
- Na pitanje **Damira Arnauta**, postavljeno u pisanoj formi na 9. sjednici Doma, odgovor je dostavilo Vijeće ministara BiH.

Dobivene odgovore komentirali su: Damir Arnaut, Mirsad Isaković i Nenad Lalić. U okviru komentara istaknuto je, odnosno zatraženo sljedeće:

Damir Arnaut istakao je poslovničku intervenciju, pozivanjem na član 175. stav (2) Poslovnika, jer Vijeće ministara BiH nije dostavilo odgovor u roku od 30 dana od njegovog postavljanja.

Nenad Lalić izrazio je nezadovoljstvo dobivenim odgovorom i postavio dopunsko pitanje Upravnom odboru Skijaškog saveza BiH, koje glasi: „Šta ste konkretno uradili i šta planirate uraditi kako biste omogućili nastavak sportske karijere najbolje skijašice i olimpijke Bosne i Hercegovine i Republike Srpske Žane Novaković koju ste neosnovano uskratili za stipendiju od Olimpijske solidarnosti, čime je naša najbolja skijašica i učesnica dvije olimpijade, te brojnih svjetskih i evropskih takmičenja, ostala bez sredstava potrebnih za daljnji nastavak sportske karijere?“

Ad.3. Zahtjev Vijeća ministara BiH za razmatranje Prijedloga zakona o izmjenama i dopunama Krivičnog zakona BiH po hitnom postupku, u skladu s članom 133. Poslovnika, zakon broj: 01,02-02-1-7/15, od 12.5.2015.

Predsjedavajući je dao uvodne napomene. Nije bilo rasprave.

Zahtjev Vijeća ministara BiH za razmatranje Prijedloga zakona o izmjenama i dopunama Krivičnog zakona BiH po hitnom postupku, u skladu s članom 133. Poslovnika, usvojen je jednoglasno, s 26 glasova „za“ (iz Federacije BiH 21, iz Republike Srpske pet).

Prijedlog zakona o izmjenama i dopunama Krivičnog zakona BiH također je usvojen jednoglasno, s 27 glasova „za“ (iz Federacije BiH 22, iz Republike Srpske pet).

Ad.4. Prijedlog zakona o Budžetu institucija BiH i međunarodnih obaveza BiH za 2015. godinu, predlagač: Predsjedništvo BiH, zakon broj: 01,02-02-1-6/15, od 5.5.2015. (prvo čitanje)

Predsjedavajući je dao uvodne napomene. Između ostalog, rekao je da je Kolegij Doma odlučio da predloži Domu da se Prijedlog zakona o Budžetu institucija BiH i međunarodnih obaveza BiH za 2015. godinu razmatra u oba čitanja na sjednici (u skladu s članom 112. stav (4) Poslovnika), a o tome će se Dom izjasniti naknadno, nakon usvajanja Prijedloga zakona u prvom čitanju.

U raspravi su učestvovali: Mirsad Đonlagić, Damir Arnaut, Željko Komšić, Aleksandra Pandurević, Jasmin Emrić, Damir Bećirović, Zaim Backović, Senad Šepić, Mirsad Mešić, Mirsad Isaković i Mirsad Đonlagić.

Mirsad Đonlagić i Damir Arnaut istakli su poslovničku intervenciju, pozivanjem na član 182. stav (2) Poslovnika, kojim je predviđeno da je na sjednicama na kojima se razmatraju prijedlozi zakona, čiji je zvanični predlagač Predsjedništvo BiH, obavezno prisustvo bar jednog člana Predsjedništva BiH. S obzirom na tu odredbu, Damir Arnaut je istakao da ministar finansija i trezora BiH ne može mijenjati odsutnog člana Predsjedništva BiH. Damir Arnaut je ukazao i na odredbu člana 73. stav (3) Poslovnika, kojom se predviđa da, ako se utvrdi da nema kvoruma, predsjedavajući Doma određuje pauzu u trajanju do 60 minuta, tokom koje pokušava osigurati kvorum. Rekao je da predsjedavajući nije postupio u skladu s tom odredbom, jer nije odredio pauzu, te zatražio da se predsjedavajući izjasni o njegovim primjedbama i da se one, u skladu s članom 82. Poslovnika, unesu u zapisnik.

Predsjedavajući Šefik Džaferović je u odgovoru na iznesene poslovničke intervencije ukazao na odredbu stava (3) člana 182. Poslovnika kojom se predviđa da *“Predsjedništvo BiH, posredstvom svojih predstavnika, učestvuje na sjednicama Doma iz stava (2) ovog člana i ima pravo i obavezu da učestvuje u raspravi u svakom trenutku.”* Istakao je da je na sjednici prisutan predstavnik koji je zamjenik predsjedavajućeg Vijeća ministara BiH, odnosno ministar finansija i trezora BiH Vjekoslav Bevanda, te da su ispunjeni uslovi za raspravu. U vezi s primjedbom u pogledu člana 73. stav (3) Poslovnika, predsjedavajući je rekao da je odredio pauzu u trajanju od dvije minute, te da je zamolio da poslanici ne izlaze iz sale i zatražio da se osigura kvorum.

Prijedlog zakona o Budžetu institucija BiH i međunarodnih obaveza BiH za 2015. godinu usvojen je u prvom čitanju, s 20 glasova „za“ (iz Federacije BiH 15, iz Republike Srpske pet), četiri „protiv“ i tri „suzdržana“ glasa.

Nakon toga, predsjedavajući je dao na glasanje prijedlog da se Prijedlog zakona odmah razmatra i u drugom čitanju, u skladu s članom 112. stav (4) Poslovnika. Ovaj prijedlog usvojen je s 20 glasova „za“ (iz Federacije BiH 15, iz Republike Srpske pet), šest „protiv“ i jednim „suzdržanim“ glasom.

Nije bilo rasprave o Prijedlogu zakona u drugom čitanju. Prijedlog zakona o Budžetu institucija BiH i međunarodnih obaveza BiH za 2015. godinu usvojen je u drugom čitanju, s 20 glasova „za“ (iz Federacije BiH 15, iz Republike Srpske pet), sedam „protiv“ i bez „suzdržanih“ glasova.

Ad.5. Prijedlog zakona o izmjenama i dopunama Zakona o sportu u BiH, predlagač: poslanik Denis Bećirović, zakon broj: 01-02-1-3/15, od 26.2.2015., sa Izvještajem Ustavnopravne komisije

Predsjedavajući je dao uvodne napomene, naglasivši da je Ustavnopravna komisija dostavila negativan izvještaj o Prijedlogu zakona.

Nije bilo rasprave.

„Za“ Izvještaj Ustavnopravne komisije o Prijedlogu zakona o izmjenama i dopunama Zakona o sportu u BiH, predlagač: poslanik Denis Bećirović, glasalo je deset poslanika (iz Federacije BiH pet, iz Republike Srpske pet), „protiv“ 14, a „suzdržana“ su bila dva poslanika. Predsjedavajući je konstatirao da Dom nije prihvatio Izvještaj Ustavnopravne komisije i da je Komisija dužna da sačini novi izvještaj, u skladu s članom 121. stav (3) Poslovnika.

Ad.6. Prijedlog zakona o izmjenama i dopunama Zakona o policijskim službenicima Bosne i Hercegovine, predlagač: Vijeće ministara BiH, zakon broj: 01,02-02-1-38/14, od 3.11.2014. (prvo čitanje)

Nakon uvodnih napomena predsjedavajućeg, diskutirao je Borislav Bojić.

Prijedlog zakona o izmjenama i dopunama Zakona o policijskim službenicima Bosne i Hercegovine usvojen je u prvom čitanju jednoglasno, s 25 glasova „za“ (iz Federacije BiH 20, iz Republike Srpske pet).

Ad.7. Prijedlog zakona o dopuni Izbornog zakona BiH, predlagač: poslanik Damir Arnaut, zakon broj: 01-02-1-2/15, od 23.2.2015., s Mišljenjem Ustavnopravne komisije

Predsjedavajući je u uvodnim napomenama podsjetio da je Ustavnopravna komisija dala negativno mišljenje o Prijedlogu zakona.

U raspravi su učestvovali: Damir Arnaut i Mirsad Đonlagić.

Mišljenje Ustavnopravne komisije usvojeno je s 18 glasova „za“ (iz Federacije BiH 13, iz Republike Srpske pet), osam „protiv“ i bez „suzdržanih“ glasova, što znači da je Prijedlog zakona o dopuni Izbornog zakona BiH, u skladu s članom 113. stav (2) Poslovnika, odbijen.

Ad.8. Izvještaj komisije Kolegija o nastojanju za postizanje saglasnosti o Zahtjevu poslanika Mirsada Mešića za razmatranje Prijedloga zakona o izmjeni Zakona o Javnom radiotelevizijskom sistemu Bosne i Hercegovine po hitnom postupku, u skladu s članom 133. Poslovnika, zakon broj: 01-02-1-5/15, od 26.3.2015.

Predsjedavajući je dao uvodne napomene.

U drugom krugu glasanja usvojen je Zahtjev za hitni postupak, sa 17 glasova „za“, devet „protiv“ (iz Federacije BiH četiri, iz Republike Srpske pet) i bez „suzdržanih“ glasova.

Nije bilo rasprave o Prijedlogu zakona.

„Za“ Prijedlog zakona o izmjeni Zakona o Javnom radiotelevizijskom sistemu Bosne i Hercegovine glasalo je 18 poslanika (iz Federacije BiH), „protiv“ devet, a „suzdržanih“ nije bilo. Predsjedavajući je konstatirao da nema potrebne entitetske većine i da će Kolegij Doma kao komisija obaviti naknadno usaglašavanje o Prijedlogu zakona o izmjeni Zakona o Javnom radiotelevizijskom sistemu Bosne i Hercegovine.

Ad.9. Izvještaj o radu Vijeća ministara BiH za 2014. godinu, broj: 01,02-50-19-422/15, od 23.3.2015.

Nakon uvodnih napomena predsjedavajućeg, u raspravi su učestvovali: Nikola Lovrinović, Damir Arnaut, Aleksandra Pandurević, Jasmin Emrić i Salko Sokolović.

Dom nije usvojio Izvještaj o radu Vijeća ministara BiH za 2014. godinu. „Za“ je glasalo devet poslanika (iz Federacije BiH), „protiv“ 16, a „suzdržanih“ nije bilo.

Nakon toga, Dom se izjašnjavao o prijedlozima zaključaka sadržanim u mišljenjima komisija, kao i o zaključcima predloženim u raspravi.

Zaključci sadržani u Mišljenju Zajedničke komisije za ljudska prava usvojeni su sa 16 glasova „za“ (iz Federacije BiH 11, iz Republike Srpske pet), bez glasova „protiv“ i deset „suzdržanih“ glasova.

Zaključci sadržani u Mišljenju Komisije za finansije i budžet usvojeni su s 20 glasova „za“ (iz Federacije BiH 15, iz Republike Srpske pet), bez glasova „protiv“ i pet „suzdržanih“ glasova.

Zaključci sadržani u Mišljenju Zajedničke komisije za evropske integracije usvojeni su s 25 glasova „za“ (iz Federacije BiH 20, iz Republike Srpske pet), bez glasova „protiv“ i dva „suzdržana“ glasa.

Zaključak koji je predložila Aleksandra Pandurević usvojen je sa 17 glasova „za“ (iz Federacije BiH 12, iz Republike Srpske pet), bez glasova „protiv“ i deset „suzdržanih“ glasova.

Zaključak koji je predložio Nikola Lovrinović nije usvojen – „za“ je glasalo deset poslanika (iz Federacije BiH pet, iz Republike Srpske pet), „protiv“ 11, a „suzdržanih“ je bilo šest poslanika. Zaključak je glasio: „U dijelu Izvještaja o radu Vijeća ministara BiH za 2014. godinu, koji se odnosi na Ministarstvo komunikacija i prometa BiH, dodati da je u proceduri bila Izmjena i dopuna Zakona o Javnom RTV sistemu.“

Usvojeni zaključci glase:

1. *„Predstavnički dom Parlamentarne skupštine Bosne i Hercegovine obavezuje Vijeće ministara Bosne i Hercegovine na poboljšanje i unapređenje međusobne saradnje, održavanjem zajedničkih sastanaka, konferencija, radionica, seminara i sl.*
2. *Predstavnički dom Parlamentarne skupštine Bosne i Hercegovine zahtijeva od Vijeća ministara Bosne i Hercegovine da prije upućivanja prijedloga zakona u proceduru pribavi mišljenje Ministarstva finansija i trezora BiH.*
3. *Predstavnički dom Parlamentarne skupštine Bosne i Hercegovine zahtijeva od Vijeća ministara Bosne i Hercegovine, odnosno resornog ministarstva, da Univerzalni periodični izvještaj o ljudskim pravima u BiH prije upućivanja dostavi na prethodno razmatranje Parlamentarnoj skupštini Bosne i Hercegovine.*
4. *Predstavnički dom Parlamentarne skupštine Bosne i Hercegovine sugerira Vijeću ministara Bosne i Hercegovine i nadležnom ministarstvu da prilikom formiranja i imenovanja delegacija Bosne i Hercegovine, kao što su: Delegacija BiH o prezentaciji Univerzalnog periodičnog pregleda stanja ljudskih prava u BiH/UPR, Etičkog tima za praćenje provođenja etičkog kodeksa o istraživanju s djecom i o djeci BiH i drugih državnih delegacija, budu imenovani i članovi Parlamentarne skupštine Bosne i Hercegovine.*
5. *Predstavnički dom Parlamentarne skupštine Bosne i Hercegovine zahtijeva od Vijeća ministara BiH i Ministarstva za ljudska prava i izbjeglice BiH da što prije, u skladu s članom 8. Zakona o zabrani diskriminacije („Službeni glasnik BiH“, broj 59/09), dostavi Parlamentarnoj skupštini BiH izvještaj o pojavama diskriminacije u BiH, te u vezi s tim predloži konkretne zakonodavne ili druge mjere.*
6. *Predstavnički dom Parlamentarne skupštine Bosne i Hercegovine traži od Uprave za indirektno oporezivanje BiH da u najkraćem roku dostavi detaljan izvještaj o povratu PDV-a za 2014. godinu po regionalnim centrima Uprave, s navođenjem svih subjekata kojima je vraćen PDV u iznosu većem od 50.000 KM.*
7. *Predstavnički dom Parlamentarne skupštine Bosne i Hercegovine traži od Uprave za indirektno oporezivanje BiH da u najkraćem roku dostavi informaciju o realizaciji NCTS projekta, koji se odnosi na nabavku odgovarajuće opreme i razvoj vlastite informatičke aplikacije.*
8. *Predstavnički dom Parlamentarne skupštine Bosne i Hercegovine traži od Uprave za indirektno oporezivanje BiH da u najkraćem roku dostavi detaljnu informaciju o problemima koje Uprava ima u realizaciji osiguranih sredstava namijenjenih za kapitalna ulaganja (izgradnja regionalnih centara Uprave), s prijedlogom mjera kojima bi se otklonile nastale teškoće.*
9. *Predstavnički dom Parlamentarne skupštine Bosne i Hercegovine traži od Uprave za indirektno oporezivanje BiH da Komisiji za finansije i budžet Predstavničkog doma PSBiH u roku od 30 dana dostavi cjelovitu informaciju o tenderu i sklopljenom ugovoru o izradi nove poreske aplikacije u Informacionom sistemu UIO, za čiju namjenu je u budžetu BiH planirano 8.000.000 KM.*
10. *Predstavnički dom Parlamentarne skupštine Bosne i Hercegovine podsjeća Vijeće ministara BiH da se pridržava zaključka usvojenog u oba doma Parlamentarne*

*skupštine BiH i poziva da se prilikom izrade budućih godišnjih izvještaja uvrsti i poseban dio koji se odnosi na cjelokupan proces evropskog integriranja Bosne i Hercegovine.*²

Ad.10. Izvještaji Ministarstva vanjske trgovine i ekonomskih odnosa BiH:

- a) Izvještaj o izdatim ispravama za vanjskotrgovinski promet oružja, vojne opreme, proizvoda dvojne i posebne namjene za 2013. godinu,
- b) Izvještaj o realizaciji vanjskotrgovinskog prometa oružja, vojne opreme, proizvoda dvojne i posebne namjene za 2012. godinu, akt broj: 01,02-24-1446/14, od 26.12.2014.

Predsjedavajući je dao uvodne napomene. U raspravi su učestvovali Nenad Lalić i Zaim Backović.

„Za“ Izvještaj o izdatim ispravama za vanjskotrgovinski promet oružja, vojne opreme, proizvoda dvojne i posebne namjene za 2013. godinu glasalo je deset poslanika (iz Federacije BiH), „protiv“ osam, a devet poslanika bilo je „suzdržano“. Predsjedavajući je konstatirao da nema potrebne entitetske većine i da će Kolegij Doma kao komisija obaviti naknadno usaglašavanje o Izvještaju o izdatim ispravama za vanjskotrgovinski promet oružja, vojne opreme, proizvoda dvojne i posebne namjene za 2013. godinu.

„Za“ Izvještaj o realizaciji vanjskotrgovinskog prometa oružja, vojne opreme, proizvoda dvojne i posebne namjene za 2012. godinu glasalo je 11 poslanika (iz Federacije BiH), „protiv“ osam, a sedam poslanika bilo je „suzdržano“. Predsjedavajući je konstatirao da nema potrebne entitetske većine i da će Kolegij Doma kao komisija obaviti naknadno usaglašavanje o Izvještaju o realizaciji vanjskotrgovinskog prometa oružja, vojne opreme, proizvoda dvojne i posebne namjene za 2012. godinu.

Nakon toga, Dom se izjasnio o prijedlogu zaključka Nenada Lalića, koji je iznesen u raspravi. Zaključak je usvojen sa 17 glasova „za“ (iz Federacije BiH 12, iz Republike Srpske pet), bez glasova „protiv“ i deset „suzdržanih“ glasova.

Zaključak glasi: *„Zadužuje se Ministarstvo vanjske trgovine i ekonomskih odnosa BiH da dostavi dopunjene tabele - anekse u ova dva izvještaja, koje se odnose na izvoz - uvoz oružja, vojne opreme, proizvoda dvojne i posebne namjene, na način da se dopune podacima koji će prikazati: naziv preduzeća koja su dobila potrebne dozvole za izvoz/uvoz - privremeni izvoz/uvoz, krajnjeg korisnika (po endjuzeru) i rok u kojem su dozvole izdate - datum podnošenja zahtjeva, datum izdavanja dozvole s rokom obrade zahtjeva i odlučivanja.“*

Ad.11. Izvještaj o učešću pripadnika Oružanih snaga Bosne i Hercegovine u operacijama podrške miru, materijal Predsjedništva BiH, akt broj: 01,02-03-42/15, od 5.1.2015.

Predsjedavajući je dao uvodne napomene, nakon kojih nije bilo rasprave.

² Zaključci br. 1 – 5. usvojeni su na prijedlog Zajedničke komisije za ljudska prava, zaključci br. 6 – 8. usvojeni su na prijedlog Komisije za finansije i budžet, zaključak br. 9. usvojen je na prijedlog Aleksandre Pandurević, a zaključak br. 10. usvojen je na prijedlog Zajedničke komisije za evropske integracije.

Izvještaj o učešću pripadnika Oružanih snaga Bosne i Hercegovine u operacijama podrške miru usvojen je jednoglasno, s 27 glasova „za“ (iz Federacije BiH 22, iz Republike Srpske pet).

Ad.12. Izvještaj o radu Odbora za žalbe građana Parlamentarne skupštine BiH za 2014. godinu, broj: 05/2-50-19-238/15, od 10.2.2015.

Predsjedavajući je dao uvodne napomene. U raspravi su učestvovali: Hanka Vajzović, Borjana Krišto i Damir Bećirović.

Dom je, sa 16 glasova „za“ (iz Federacije BiH 11, iz Republike Srpske pet), četiri „protiv“ i pet „suzdržanih“ glasova, usvojio Izvještaj o radu Odbora za žalbe građana Parlamentarne skupštine BiH za 2014. godinu.

Zaključci sadržani u Izvještaju usvojeni su s 20 glasova „za“ (iz Federacije BiH 15, iz Republike Srpske pet), bez glasova „protiv“ i pet „suzdržanih“ glasova. Zaključci glase:

ZAKLJUČAK I.

1. *„Usvaja se Izvještaj o radu Odbora za žalbe građana Parlamentarne skupštine BiH za 2014. godinu.*
2. *Podržavaju se sve preporuke Odbora za žalbe građana, s ciljem unapređenja rada policijskih agencija na nivou Bosne i Hercegovine.*
3. *Zadužuju se policijske agencije na nivou Bosne i Hercegovine da izrade planove o potrebnim aktivnostima za realizaciju preporuka Odbora u razumnom roku.*
4. *Zadužuju se Ministarstvo finansija i trezora BiH, te drugi nadležni organi i institucije Bosne i Hercegovine da pruže punu podršku policijskim agencijama na nivou Bosne i Hercegovine u realizaciji preporuka Odbora u razumnom roku, a u skladu s planiranim aktivnostima iz tačke 3. ovog zaključka.“*

ZAKLJUČAK II.

„Poziva se Uprava za indirektno oporezivanje BiH da bez odgađanja pristupi realizaciji Zaključka Predstavničkog doma Parlamentarne skupštine BiH, broj: 01/a-50-1-15-64/14, od 26.3.2014., koji glasi:

Zadužuje se Uprava za indirektno oporezivanje BiH da uradi neophodnu generalnu rekonstrukciju aparata za videonadzor, zamijeni stare aparate novim, te u saradnji s Graničnom policijom BiH pronađe odgovarajuće rješenje za nefunkcioniranje, odnosno loše funkcioniranje videonadzora na graničnim prijelazima u Bosni i Hercegovini.“

Ad.13. Izvještaj o radu parlamentarnog vojnog povjerenika BiH za 2014. godinu, broj: 01,02-50-19-338/15, od 3.3.2015.

Nakon uvodnih napomena predsjedavajućeg, nije bilo rasprave.

Izvještaj o radu parlamentarnog vojnog povjerenika BiH za 2014. godinu usvojen je jednoglasno, s 27 glasova „za“ (iz Federacije BiH 22, iz Republike Srpske pet).

Ad.14. Izvještaj o radu Vijeća nacionalnih manjina BiH za 2014. godinu, akt broj: 01,02-50-19-373/15, od 12.3.2015.

Predsjedavajući je dao uvodne napomene, nakon kojih je diskutirao Zaim Backović.

Izvještaj o radu Vijeća nacionalnih manjina BiH za 2014. godinu usvojen je s 24 glasa „za“ (iz Federacije BiH 19, iz Republike Srpske pet), bez glasova „protiv“ i dva „suzdržana“ glasa.

Ad.15. Izvještaj o radu Nezavisne komisije za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku Sud Bosne i Hercegovine, strani sudovi za djela predviđena Krivičnim zakonom Bosne i Hercegovine ili međunarodnim ugovorom čija je potpisnica Bosna i Hercegovina, ili drugi sud u skladu sa zakonom Bosne i Hercegovine za 2014. godinu, broj: 01,02-37-451/15, od 26.3.2015.

Nakon uvodnih napomena predsjedavajućeg, diskutirala je Nermina Kapetanović.

Izvještaj o radu Nezavisne komisije za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku Sud Bosne i Hercegovine, strani sudovi za djela predviđena Krivičnim zakonom Bosne i Hercegovine ili međunarodnim ugovorom čija je potpisnica Bosna i Hercegovina, ili drugi sud u skladu sa zakonom Bosne i Hercegovine za 2014. godinu usvojen je s 22 glasa „za“ (iz Federacije BiH 17, iz Republike Srpske pet), bez glasova „protiv“ i četiri „suzdržana“ glasa.

Ad.16. Izvještaj Komisije za saobraćaj i komunikacije o javnom saslušanju predstavnika BHANSA, BHDCA i Vijeća ministara BiH u vezi s propustima navedenim u Izvještaju o izvršenoj reviziji učinka o temi: „Kontrola zračnog saobraćaja Bosne i Hercegovine“, broj: 01/5-16-1-1131/14, od 27. 4. 2015.

Predsjedavajući je dao uvodne napomene. U raspravi su učestvovali: Fehim Škaljić, Zaim Backović, Momčilo Novaković, Nikola Lovrinović, Hanka Vajzović i ministar komunikacija i prometa BiH Slavko Matanović.

Izvještaj Komisije za saobraćaj i komunikacije o javnom saslušanju predstavnika BHANSA, BHDCA i Vijeća ministara BiH u vezi s propustima navedenim u Izvještaju o izvršenoj reviziji učinka o temi: „Kontrola zračnog saobraćaja Bosne i Hercegovine“ usvojen je s 25 glasova „za“ (iz Federacije BiH 20, iz Republike Srpske pet), bez glasova „protiv“ i dva „suzdržana“ glasa. Time su usvojeni zaključci sadržani u Izvještaju koji glase:

- 1. „Predstavnički dom Parlamentarne skupštine BiH traži od Vijeća ministara BiH da se u što kraćem roku imenuju članovi Vijeća BHANSA i Uprave BHANSA.*
- 2. Predstavnički dom Parlamentarne skupštine BiH traži od Vijeća ministara BiH da se, nakon imenovanja članova Vijeća BHANSA i Uprave BHANSA, sačini akcioni plan procesa preuzimanja i uspostavljanja kontrole zračnog saobraćaja Bosne i Hercegovine, s jasno utvrđenim nosiocima aktivnosti i rokovima.“*

Nakon toga, Dom se izjašnjavao o prijedlogu zaključka koji je u raspravi iznio Nikola Lovrinović, a glasi: „Svi organi koji Parlamentarnoj skupštini BiH podnose izvještaje o radu

i finansijskom poslovanju trebaju dostaviti sažetak izvještaja, s naznakama problema i prijedloga rješenja, a osnov za to je izvještaj urađen u skladu s metodologijom. Sažetak može imati najviše pet stranica. " „Za“ prijedlog zaključka glasalo je deset poslanika (iz Federacije BiH), „protiv“ pet, a „suzdržanih“ je bilo deset poslanika. Predsjedavajući je konstatirao da nema potrebne entitetske većine i da će Kolegij kao komisija obaviti naknadno usaglašavanje o prijedlogu zaključka Nikole Lovrinovića.

Prije prelaska na tačku 17., predsjedavajući je dao na glasanje prijedlog da se objedini rasprava o tačk. 17. i 18., s obzirom na to da je riječ o materijalima Izvozno-kreditne agencije BiH. Ovaj prijedlog prihvaćen je jednoglasno, s 27 glasova „za“ (iz Federacije BiH 22, iz Republike Srpske pet).

Ad.17. Izvještaj o radu Upravnog odbora Izvozno-kreditne agencije BiH za 2014. godinu, broj: 01,02-50-19-486/15, od 1.4.2015.

Ad.18. Informacija Izvozno-kreditne agencije BiH o mjerama i radnjama koje su preduzete s ciljem otklanjanja teškoća i osiguranja potrebnih preduslova za normalan rad, broj: 01-50-19-487/15, od 1.4.2015.

Predsjedavajući je dao uvodne napomene. U raspravi su učestvovali: Mirsad Mešić, Nikola Lovrinović, Safer Demirović, Zaim Backović, Damir Arnaut i Nenad Lalić.

Izvještaj o radu Upravnog odbora Izvozno-kreditne agencije BiH za 2014. godinu nije usvojen. "Za" je glasalo 11 poslanika (iz Federacije BiH deset, iz Republike Srpske jedan), "protiv" 15, a "suzdržan" je bio jedan poslanik.

„Za“ primanje k znanju Informacije Izvozno-kreditne agencije BiH o mjerama i radnjama koje su preduzete s ciljem otklanjanja teškoća i osiguranja potrebnih preduslova za normalan rad glasalo je 14 poslanika (iz Federacije BiH), "protiv" devet, a "suzdržana" su bila dva poslanika. Predsjedavajući je konstatirao da nema potrebne entitetske većine i da će Kolegij Doma kao komisija obaviti naknadno usaglašavanje o primanju k znanju navedene informacije. Također je konstatirao da će se Dom naknadno izjasniti o prijedlogu zaključka sadržanom u Mišljenju Komisije za vanjsku trgovinu i carine koji glasi: *„Zadužuje se Upravni odbor Izvozno-kreditne agencije BiH da održi hitnu sjednicu u roku od 15 dana na kojoj će, uz prisustvo predstavnika osnivača Bosne i Hercegovine s entitetima, utvrditi prijedlog konkretnih mjera za sanaciju stanja u Izvozno-kreditnoj agenciji BiH s projekcijom njenog daljnjeg funkcioniranja, te da o svemu u najkraćem roku obavijesti Parlamentarnu skupštinu BiH, uključujući sve relevantne nivoe vlasti.“*

Ad.19. Informacija o Godišnjem planu obuke i vježbi pripadnika i jedinica Oružanih snaga BiH u inozemstvu za 2015. godinu, materijal Ministarstva odbrane BiH, broj: 03/1-03-971/14, od 1.9.2014., sa Izmjenama i dopunama Godišnjeg plana obuke i vježbi pripadnika i jedinica Oružanih snaga BiH u inozemstvu za 2015. godinu, broj: 03/1,03/1a-03-339/15, od 3.3.2015.

Predsjedavajući je dao uvodne napomene. Nije bilo rasprave.

Informacija o Godišnjem planu obuke i vježbi pripadnika i jedinica Oružanih snaga BiH u inozemstvu za 2015. godinu, materijal Ministarstva odbrane BiH, sa izmjenama i dopunama Godišnjeg plana obuke i vježbi pripadnika i jedinica Oružanih snaga BiH u inozemstvu za 2015. godinu primljena je k znanju jednoglasno, s 24 glasa „za“ (iz Federacije BiH 19, iz Republike Srpske pet).

Ad.20. Državni akcioni plan o hitnim slučajevima zaštite stanovništva od jonizirajućeg zračenja u slučaju vanrednog događaja, nuklearne nesreće ili nastanka štete, materijal Državne regulatorne agencije za radijacijsku i nuklearnu sigurnost BiH, broj: 01,02-04-1372/14, od 16.12.2014.

Predsjedavajući je dao uvodne napomene. U raspravi su učestvovali: Zaim Backović, Jasmin Emrić, Borislav Bojić, Safer Demirović, Mirsad Đonlagić i zamjenik direktora Državne regulatorne agencije za radijacijsku i nuklearnu sigurnost BiH Jovica Bošnjak.

Mirsad Đonlagić tražio je da se zapisnički konstatira njegova poslovnička intervencija, rekavši da poslanici iz Kluba SBB-a osiguravaju kvorum na sjednici. Ukazao je na odredbu člana 7. stav (2) Poslovnika, prema kojoj poslanik ima pravo i obavezu da prisustvuje sjednici Doma.

Predsjedavajući je rekao da svaki poslanik svojim ponašanjem najbolje govori o sebi, pa tako i prisustvom, odnosno odsustvom sa sjednice. Pozvao je nadležne službe Doma da, u slučaju kad se utvrdi da nema kvoruma, zabilježe koji su poslanici odsutni i to prosljede komisiji koja je nadležna za primjenu Kodeksa ponašanja poslanika i delegata u Parlamentarnoj skupštini BiH.

Državni akcioni plan o hitnim slučajevima zaštite stanovništva od jonizirajućeg zračenja u slučaju vanrednog događaja, nuklearne nesreće ili nastanka štete, materijal Državne regulatorne agencije za radijacijsku i nuklearnu sigurnost BiH, usvojen je jednoglasno, s 26 glasova „za“ (iz Federacije BiH 21, iz Republike Srpske pet).

Ad.21. Prijedlog rezolucije o Sutorini, predlaže: poslanik Denis Bećirović, broj: 01-02-2-1440/14, od 24.12.2014.

Nakon uvodnih napomena predsjedavajućeg, u raspravi su učestvovali: Mirsad Mešić, Zaim Backović, Hanka Vajzović, Damir Arnaut, Momčilo Novaković, Jasmin Emrić, Mirsad Đonlagić i Denis Bećirović.

Dom se najprije izjašnjavao o prijedlogu zaključaka koje je u raspravi predložio Zaim Backović, a koji glase:

1. *„Obavezuje se Ustavnopravna komisija Predstavničkog doma da pozove relevantne stručnjake iz oblasti međunarodnog prava koji nisu interesno vezani, iz zemalja koje su članice Evropske unije, ali nisu u dodiru s Bosnom i Hercegovinom.*
2. *Kolegij Predstavničkog doma obavezuje se da, kada bude javno saslušanje, pozove sve zainteresirane poslanike.”*

Zaključci nisu usvojeni – „za“ je glasalo šest poslanika (iz Federacije BiH pet, iz Republike Srpske jedan), „protiv“ 20, a jedan poslanik bio je „suzdržan“.

Nakon toga, predsjedavajući je dao na izjašnjavanje prijedlog amandmana Hanke Vajzović, koji glasi: „Predstavnički dom Parlamentarne skupštine BiH traži od Vijeća ministara BiH da formira nezavisnu ekspertnu komisiju koja će utvrditi ispravnost Ugovorom utvrđene granice između Bosne i Hercegovine i Republike Crne Gore na granici općina Foča i Pljevlja (područje Malinjak).“ Prijedlog amandmana nije usvojen – „za“ je glasalo devet poslanika (iz Federacije BiH osam, iz Republike Srpske jedan), „protiv“ 17, a jedan poslanik bio je „suzdržan“.

Dom nije usvojio Prijedlog rezolucije o Sutorini – „za“ je glasalo sedam poslanika (iz Federacije BiH šest, iz Republike Srpske jedan), „protiv“ 17, a dva poslanika bila su „suzdržana“.

Ad.22. Prijedlog odluke o imenovanju sekretara Predstavničkog doma Parlamentarne skupštine BiH

Predsjedavajući je dao uvodne napomene. U raspravi su učestvovali: Borjana Krišto, Mirsad Đonlagić, Maja Gasal-Vražalica, Momčilo Novaković, Damir Arnaut, Monika Tomić, Denis Bećirović i Nermina Kapetanović.

Dom je, s 19 glasova „za“ (iz Federacije BiH 14, iz Republike Srpske pet), dva glasa „protiv“ i pet „suzdržanih“ glasova, usvojio Prijedlog odluke o imenovanju sekretara Predstavničkog doma Parlamentarne skupštine BiH (uz izmjenu koju je predložila Borjana Krišto, a tiče se odredbe o stupanju na snagu, odnosno o primjeni Odluke). Za sekretara Predstavničkog doma imenovan je Marin Vukoja.

Ad.23. Prijedlog odluke o imenovanju sekretara Zajedničke službe Parlamentarne skupštine BiH

Predsjedavajući je dao uvodne napomene, naglasivši da se i na ovu odluku odnosi primjedba koju je istakla Borjana Krišto u vezi s prethodnom odlukom. Nije bilo rasprave.

Dom je, s 20 glasova „za“ (iz Federacije BiH 15, iz Republike Srpske pet), dva glasa „protiv“ i pet „suzdržanih“ glasova, usvojio Prijedlog odluke o imenovanju sekretara Zajedničke službe Parlamentarne skupštine BiH (uz izmjenu koju je predložila Borjana Krišto, a tiče se odredbe o stupanju na snagu, odnosno o primjeni Odluke). Za sekretara Zajedničke službe imenovana je Aida Koristović.

Ad.24. Prijedlog zaključka poslanika Jasmina Emrića, koji glasi: „Zadužuje se Vijeće ministara BiH da za prvu narednu sjednicu Predstavničkog doma pripremi i dostavi Informaciju o postupku razgovora o ocjenjivanju i odobrenju pogodnosti lokacije na Trgovskoj gori za smještaj Centra za zbrinjavanje radioaktivnog otpada koji vodi Državni zavod za radiološku i nuklearnu sigurnost Republike Hrvatske“, akt broj: 01-50-1-628-1/15, od 29.4.2015.

Nakon uvodnih napomena predsjedavajućeg, diskutirao je Jasmin Emrić.

Zaključak Jasmina Emrića usvojen je s 20 glasova „za“ (iz Federacije BiH 15, iz Republike Srpske pet), bez glasova „protiv“ i četiri „suzdržana“ glasa.

Ad.25. Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za imenovanje generalnog revizora i zamjenika generalnog revizora Ureda za reviziju institucija Bosne i Hercegovine, predlagач: Zajednički kolegij oba doma Parlamentarne skupštine BiH, broj: 01,02-34-1-538/15, od 9.4.2015.

Predsjedavajući je u uvodnim napomenama podsjetio da, u skladu s odredbama Zakona o reviziji institucija BiH, dva člana Privremene zajedničke komisije moraju biti pripadnici opozicionih stranaka. S obzirom na to da Kolegij Doma nije postigao dogovor o prijedlogu članova Komisije, predložio je da se rasprava o ovoj tački dnevnog reda odgodi za narednu sjednicu Doma.

Na prijedlog predsjedavajućeg, Dom je, s 22 glasa „za“ (iz Federacije BiH 17, iz Republike Srpske pet), jednim „protiv“ i bez „suzdržanih“ glasova, odlučio da se rasprava o Prijedlogu zaključka o osnivanju Privremene zajedničke komisije oba doma Parlamentarne skupštine BiH za provođenje procedure za imenovanje generalnog revizora i zamjenika generalnog revizora Ureda za reviziju institucija Bosne i Hercegovine odgodi za narednu sjednicu Doma.

Ad.26. Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za izbor četiri člana Upravnog odbora Agencije za razvoj visokog obrazovanja i osiguranje kvaliteta, predlagач: Zajednički kolegij oba doma Parlamentarne skupštine BiH, broj: 01,02-34-1-539/15, od 9.4.2015.

Predsjedavajući je dao uvodne napomene.

Damir Arnaut istakao je poslovničku intervenciju, pozivanjem na član 67. stav (1) Poslovnika, rekavši da u Prijedlogu zaključka nisu navedena imena članova Privremene zajedničke komisije, već su ostavljene samo prazne linije umjesto imena. Naglasio je da se od ostalih poslanika zahtijeva da sve materijale i prijedloge zaključaka dostavljaju u pisanoj formi, a da to nije slučaj kada je u pitanju Kolegij Doma.

Mirsad Donlagić je, nakon iznošenja ove primjedbe, u ime Kluba poslanika SBB-a, tražio pauzu u trajanju od pola sata. Nakon pauze, obrazložio je da je pauzu tražio da bi poslanici iz Kluba SBB-a zauzeli stav u vezi s ovim pitanjem, te da bi dali mogućnost Kolegiju da ispoštuje odredbe Poslovnika na koje je ranije ukazano.

Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za izbor četiri člana Upravnog odbora Agencije za razvoj visokog obrazovanja i osiguranje kvaliteta usvojen je s 19 glasova „za“ (iz Federacije BiH 14, iz Republike Srpske pet), četiri „protiv“ i tri „suzdržana“ glasa. U Privremenu zajedničku komisiju imenovani su poslanici: Mensura Beganović, Nenad Lalić i Nikola Lovrinović.

Ad.27. Prijedlog zaključka o formiranju Interresorne radne grupe za izmjenu izbornog zakonodavstva BiH, predlagač: Zajednički kolegij oba doma Parlamentarne skupštine BiH, broj: 01,02-34-1-540/15, od 9.4.2015.

Predsjedavajući je dao uvodne napomene, rekavši da su Kolegij Doma i Prošireni kolegij predložili da se u Interresornu radnu grupu imenuju poslanici: Hazim Rančić, Borjana Krišto i Lazar Prodanović.

Damir Arnaut ponovo je istakao poslovničku intervenciju pozivanjem na član 67. stav (2) Poslovnika, rekavši da u Prijedlog zaključka nisu unesena imena.

Predsjedavajući je rekao da je Poslovnik ispoštovan, da je Prijedlog zaključka dostavljen u pisanoj formi i da su imena poslanika upravo saopćena.

Nakon toga je Mirsad Đonlagić ponovo tražio pauzu u trajanju od 15 minuta.

U raspravi su učestvovali Damir Arnaut i Mirsad Isaković.

Dom se najprije izjašnjavao o prijedlogu zaključka koji je u raspravi iznio Damir Arnaut, a koji glasi:

U Prijedlogu zaključka o formiranju Interresorne radne grupe za izmjenu izbornog zakonodavstva BiH u članu 2. umjesto tačke dodaje se zarez i nakon zareza tekst koji glasi: „a osigurati će se i učešće najmanje tri predstavnika nevladinog sektora u skladu s kriterijima koje utvrdi Vijeće ministara BiH“.

U članu 4. umjesto tačke dodaje se zarez i nakon zareza tekst koji glasi: „a najkasnije do 1. februara 2016. godine“.

U članu 6. umjesto tačke dodaje se zarez, a nakon zareza tekst koji glasi: „ali naknada ne može biti isplaćena za rad tokom redovnog radnog vremena“.

Prijedlog zaključka nije usvojen – „za“ je glasalo 11 poslanika (iz Federacije BiH), „protiv“ 14, a „suzdržana“ su bila dva poslanika.

Prijedlog zaključka o formiranju Interresorne radne grupe za izmjenu izbornog zakonodavstva BiH usvojen je s 19 glasova „za“ (iz Federacije BiH 14, iz Republike Srpske pet), pet „protiv“ i jednim „suzdržanim“ glasom. U Interresornu radnu grupu imenovani su poslanici: Hazim Rančić, Borjana Krišto i Lazar Prodanović.

Ad.28. Prijedlog odluke o izmjenama Odluke o izboru članova zajedničkih komisija oba doma Parlamentarne skupštine BiH, predlagač: poslanik Damir Bećirović, akt broj: 01-50-19-1412-1/14, od 8.4.2015.

Nakon uvodnih napomena predsjedavajućeg, nije bilo rasprave.

Prijedlog odluke o izmjenama Odluke o izboru članova zajedničkih komisija oba doma Parlamentarne skupštine BiH usvojen je s 21 glasom „za“ (iz Federacije BiH 16, iz Republike Srpske pet), bez glasova „protiv“ i pet „suzdržanih“ glasova. Odlukom je predviđena izmjena u članstvu dvije komisije na način da je poslanica Maja Gasal-Vražalica, koja je bila izabrana za članicu Zajedničke komisije za administrativne poslove, sada izabrana za članicu Zajedničke komisije za ljudska prava, a poslanica Mensura Beganović, koja je bila izabrana za članicu

Zajedničke komisije za ljudska prava, sada je izabrana za članicu Zajedničke komisije za administrativne poslove.

Ad.29. Razmatranje ostavke Semihe Borovac na mjesto članice i prve zamjenice Nezavisne komisije za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku Sud Bosne i Hercegovine, strani sudovi za djela predviđena Krivičnim zakonom Bosne i Hercegovine ili međunarodnim ugovorom čija je potpisnica Bosna i Hercegovina, ili drugi sud u skladu sa zakonom Bosne i Hercegovine, akt broj: 01,02-34-1-501/15, od 22.4.2015., i akt broj: 05/6-34-1-501/15, od 20.4.2015.

Predsjedavajući je dao uvodne napomene. Nije bilo rasprave.

Dom je, s 21 glasom „za“ (iz Federacije BiH 16, iz Republike Srpske pet), bez glasova „protiv“ i četiri „suzdržana“ glasa, usvojio ostavku Semihe Borovac na mjesto članice i prve zamjenice Nezavisne komisije za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku Sud Bosne i Hercegovine, strani sudovi za djela predviđena Krivičnim zakonom Bosne i Hercegovine ili međunarodnim ugovorom čija je potpisnica Bosna i Hercegovina, ili drugi sud u skladu sa zakonom Bosne i Hercegovine.

Ad.30. Davanje saglasnosti za ratifikaciju Sporazuma o vojnoj finansijskoj saradnji između Vijeća ministara Bosne i Hercegovine i Vlade Republike Turske i Provedbenog protokola u vezi s finansijskom pomoći između Vijeća ministara Bosne i Hercegovine i Vlade Republike Turske, broj: 01,02-05-2-644/15, od 4.5.2015.

Nakon uvodnih napomena predsjedavajućeg nije bilo rasprave.

Saglasnost za ratifikaciju Sporazuma o vojnoj finansijskoj saradnji između Vijeća ministara Bosne i Hercegovine i Vlade Republike Turske i Provedbenog protokola u vezi s finansijskom pomoći između Vijeća ministara Bosne i Hercegovine i Vlade Republike Turske data je jednoglasno, s 25 glasova „za“ (iz Federacije BiH 20, iz Republike Srpske pet).

Ad.31. Davanje saglasnosti za ratifikaciju Amandmana broj 3 na Ugovor o finansiranju, sklopljen između Bosne i Hercegovine i Evropske investicione banke 21.12.2005. u Sarajevu i 28.12.2005. u Luksemburgu, s naknadnim izmjenama (Ugovor o finansiranju) za projekat – *Željeznice u BiH II. (Fi 23.376)*, broj: 01,02-05-2-650/15, od 6.5.2015.

Nakon uvodnih napomena predsjedavajućeg, nije bilo rasprave.

Saglasnost za ratifikaciju Amandmana broj 3 na Ugovor o finansiranju, sklopljen između Bosne i Hercegovine i Evropske investicione banke 21.12.2005. u Sarajevu i 28.12.2005. u Luksemburgu, s naknadnim izmjenama (Ugovor o finansiranju) za projekat – *Željeznice u BiH II. (Fi 23.376)* data je s 20 glasova „za“ (iz Federacije BiH 15, iz Republike Srpske pet), bez glasova „protiv“ i sedam „suzdržanih“ glasova.

Nakon toga, Dom se izjasnio o prijedlogu zaključaka Jasmina Emrića, koji glase:

1. *„Zadužuje se Ministarstvo finansija i trezora BiH da istraži mogućnost nove izmjene i dopune Ugovora o finansiranju, sklopljenog između Bosne i Hercegovine i Evropske investicione banke 21.12.2005. u Sarajevu i 28.12.2005. u Luksemburgu, s naknadnim izmjenama („Ugovor o finansiranju“) za projekat – Željeznice u BiH II. (Fi 23.376), kako bi se u Prilog A.1. „Tehnički opis“, u odjeljku „Opis“ dodala nova prioriteta dionica na način da se iza tačke d) dodaje nova tačka koja glasi:
e) *Dionica jednotračne pruge Dobrljin (granica s Republikom Hrvatskom) - Bosanski Novi/Novi Grad - Bihać - Osredci (granica s Republikom Hrvatskom).**
2. *Ministarstvo finansija i trezora BiH ima obavezu da o realizaciji ovog zaključka dostavi informaciju Predstavničkom domu Parlamentarne skupštine BiH.“*

Zaključci su usvojeni s 19 glasova “za” (iz Federacije BiH 14, iz Republike Srpske pet), bez glasova “protiv” i osam “suzdržanih” glasova.

Sjednica je završena u 19,30 sati.

Sastavni dio Zapisnika je transkript 11. sjednice Predstavničkog doma.

SEKRETAR
PREDSTAVNIČKOG DOMA
mr. sc. Dragoljub Reljić

PREDSJEDAVAJUĆI
PREDSTAVNIČKOG DOMA
Šefik Džaferović